

J'avos à peu près 11 ans, m'sœur aussi, vu qu'in est jumelles. Mi, j'm'appelle Faustine et m'sœur ché Camile.

In s'arssimpe pon vramint, même qu'in est jumelles.

Mi sus blonde avec des longs caveux et j'sus finékette. Camile, ché l'contraire : elle est brune avec des caveux courts et elle s'porte bien.

A ch'momint là, in habitot dins ch'coron du quatorsse. In ch' connaichot tertous dins ch'coron.

Chétot l'belle vie, tous chés gins y s'parlotent. Chés femmes elles di jotent un peu su el dos eud tertous, mais chétot pon méquant, chétot juste pour dire, pour passer sin timps.

Si fallot donner in cop d'main, tertous le fai jotent. In fai jot des rutes fêtes dins ch'coron !

A l' Sainte Barpe alors là ch'étot pire!

Chés hommes y fai jotent ginsse et quind ils arvénotent à l' baraque, ch'étot pu el même canchon!

Chés femmes bertonnotent in les traitint d'arsouilles!

In étot fins bénaches, nouzautes chés tiots, même si des fos fallot s'méfier car dès qu'in fai jot quèque cosse, ch'étot cafté à nos parints et des fos in prenot des rutes tatouilles !

In étot in 6ème à ch'collèche du villache. In s'amusot gramint. Ch'étot pon comme asteur.

In allot à pieds à ch'collèche. Tout du long d'el voyette, in sonnot à chés portes et in s'sauvot in courint.

Des fos, in allot à l'marotte dins chés gardins et in mingeot des pommes acites pleines de limuchons. Cha donnot des maux ed vinte, mais in étot contints.

Au collèche in obéichot, y étot pon question que nos parints sotent convoqués par ech'directeur. In devot nettyer l'cour et passer l'groet dins l'gardin.

In fai jot des leçons eud cosses et in même timps, in apprenot à cultiver chés légueumes.

In arvenint d'ech' collèche in ramassot ch'courrier dins l'bote à lettres et in l'posot su l'tape.

Ch'étot toudis ainsi. In s'artournot pon su l'courrier, in s'contintot d'el poser su l'tape pour chés parints.

Ensuite in archinot des bonnes tartines avec d'el confiture qui guile, des chucs candy et d'el limonate primerosse.

In avot querre cha, asteur in treufe pu d'el limonate comme dins l'timps.

Pourtint, je ne peux pon oublier ce jour où in ouvrint l'bote à lettres, y avot chés prospectus comme toudis, mais y avot surtout eune grinte enveloppe marron.

In a ravisé quo qu'y étot écrit ed'sus. Chétot marqué : « Famille Kloocykyk ».

Ch'étot pon habituel.

Souvint ch'étot adressé à ch'père, ou à note mère, mais al' famille ch'étot l'première fos.

Camile elle a voulu qu'in l'ouffe, mi j'ai pon voulu, j'avos peur eud printe eune tatouille.

Pis ch'étot pon poli, Camile a arposé ch'l'inveloppe.

Malgré tout, j'étois comme em' sœur, j'étois intriguée.

In s'déminot quo qui pouvot y avoir eud' dins?!

Ch'étot pon l'collèche, y avot pon l'timpon. Pis ch'étot pon l'momint d'ech' carnet d'notes.

Camile a repris ch'l'inveloppe, elle essayot eud vire à travers avec el contre-jour d'el ferniête, mais même in l'artournint dins tous les sens, in voyot rin.

In la pesot, soupesot, in a ravisé ech' cachet d'el poste, cha n'a servi à rin, in trovot pon d'indices.

In la même niflée, des fos qu'y aurot eu in sintimint qu'in connaichot, là non pu cha n'a rin donné.

Alors elle a arposé ch'l'inveloppe et in a attendu que note mère elle rinte pour qu'elle l'oufe.

In s'est mises à faire nos devoirs, enfin surtout mi, pace que Camile elle a préféré printe sin goûter.

Je la millos: elle ravisot un cop s'tartine, un cop ch'l'inveloppe. Elle busillot. Ch'étot visipe vu qu'elle avot eune rite qui s'mettot in plein milieu d'sin front.

« Faustine té cros que ché quo dins ch'l'inveloppe? Si cha s'treufe chés des billets pour aller au cinéma!... Ouais à tous les cops ché cha!... J'ai dit à ch'père que j'auros querre d'y aller! »
« Bin mi j'pinse plutôt qu'ché des tickets eud' ducasse, j'ai vu maman qui parlot avec chés forains le cop dernier, et elle sait qu'in a quer cha »...
In a élaboré tout un tas d'hypothèses, in aurot fini prix Nobel eud' mathématiques avec ech' nompe d'hypothèses qu'in avot imaginé, si not'mère elle étot pon rintrée à ch'momint là.

In li a dit « bonjour » in vitesse et in lui a tindu ch'l'inveloppe pour qu'elle l'oufe.
In a bien mousé car elle n'a pas voulu ! Fallot qu'in attinte ech'père!
Camile tintot d'insister, mais not'mère n'chédot pon.

A l'plache, in a du mette el tape et raviser l'télé dins l'calme. Pindint ech'timps là, maman préparot ch'souper.

In disot pon « dîner » à l'mason, pour le repas du soir, in disot « souper » et même si j'ai vieilli asteur, j'dis toudis cha.

In ravisot l'horloche, in trovot qu'ech' père y étot vramint long pour arvenir.

Alors quind in a intindu aboyer chés quiens, Framboise et Youki, in a sauté d'ech' fauteul pour courir vire note père.

Y sortot à peine d'el carrette, qu'in li démindot d'euvrir ech'l'inveloppe!

Y est rintré dins l'barraque, y a posé sin capiau su ech'meupe et y a imbrassé note mère. In pinsot qu'y prénot trop d'timps, même maman étot al presse qu'y oufe ech'courrier.

In étot tellmint heureusses avec tous chés plans qu'in avot busillés, qu'in voulot savoir d'où qu'in irot s'poumèner, car, pour nouzotes ch'étot sûr, in allot avoir quèque cosse eud'bien.

Ch'père a pris ch'l'inveloppe, il a lu dins tiète quo qu'y étot écrit, y a souri et in même timps y étot artourné, cha s'voyot.

M'man li a dit de lire tout haut, car elle comminchot aussi à se deminder quoi.

Et il a comminché s'lecture...

« Je n'savos pon commint vous dire merci à tizote et à tertous de t'famille, alors j't'ai fait eune tiote poésie:

J' n'éto rin
un sdf comme les autes
comme gramint d'autes
jusqu'à ch'momint précis
su ch'pavé
d'où qu't'es arrivé
nos yux s'étoient noyés
les uns dins les autes
té m'as tindu t'main
té m'as arlevé
ché à ch'momint là
qu'tout à comminché
et qu't'as cangé m'vie. »

In étot débalées, in comprenot rin! In attendot eun' belle pécaille et à l'plache y avot eune histoire qu'in n'savot pon l'bout qu'y allot d'vint!

In avot l'babelle bloquée!

Note mère avot compris et comme in restot bouque ouverte, ech'père nous a raconté de qui vénot

ch'poème. Sin nom à ch'l'inconnu, ch'étot Adrien.

« Adrien a vingt ans. Y est brun avec beaucoup de caveux. Y est pon fort grand, mais y est pon tiot non pu. Y est eud talle normale quoi.

Quind j'l'ai rincontré, y étot toudis à ch' fû rouche, el même fû rouche tous les jours.

J' el voyos à chaque cop que j'allos à min travail. In a fini par eus' faire sine à forche deus' vire.

Eune fos, j'avos du tims d'vint mi, alors j'me sus arrêté pour y causer.

A ch' momint là, y m'a raconté s'vie.

Y étot d'eune famille qui gagnot pon mirouille, mais eune bonne famille. Y allot à l'école comme tous chés jonnes.

Y étot ni bon, ni brelle, y fésot ech'qui fallot pour ête dins l'mitant d'el classe.

Pis y a comminché à fréquinter des gins qui n'fallot pon, y sa laiché intraîner. Y a fait queue et a quitté l'école.

Y a comminché à teurner mal. Y es dévnu indine.

Y a barboté à drote et à gauche et du cop, s'famille l'a mis dehors.

Y a skatté din des liux qu'in mettrot même pon un quien et y a fini su ch'pavé.

Y m'a mis larme à l'oeul avec ech' n'histoire. Ch'étot pon des mintiries, cha s'voyot.

J'étos trisse eud vire cha.

Alors, quèques tims pu tard, j'y ai déposé des affaires, des loques propes, des babioles pour li s'laver et de quo minger aussi.

Pis cha a duré, ch'étot dévnu eune habitute. Tertoutes les semaines, j'm'arrêtos, j'y donnos d'quo et in causot.

In a appris à s'connaîte et j'voulos l'aider, alors j'faijos comme ech' pouvos.

Ché quind in est allé querre ech' sapin d'Noël avec vote mère à mon Norbert, qu'in a vu qu'y cachot quèqu'in pour arranger cheule pépinière.

Du cop j'ai dit à Norbert, mi j'connos quèqu'in pour tin travail et j'ai arméné Adrien.

In a donné ch'viux biclou qui traînot au fond d'ech' garache à Adrien pour qu'il puisse aller à sin nouviau travail.

Comme ch'étot pon un gros fate, Norbert l'a imbauché et asteur, y a pu personne à ch'fû rouche ».

Si su ch'cop in étot rudmint dépitées, mi pis m'sœur Camile, in réfléchissint un tiot peu, in étot fières eud note père!

Y avot vramint bien agi. Y avot dépassé l'sintimint d'indifférence face à ch't'homme qu'y étot queut si bas.

Ech'père l'avot aidé à s'arléver, ch'étot cha l'humanité.

Ch'étot miux cheule leçon eud vie, que tout che qu'in avot rêvé, avint que ch'père oufe cheule lette.

Quèques années pu tard, j'ai raconté cheule histoire aux jonnes qui vénotent dins m'n'association:

« un boulot, un dodo » qu'j'avos fondée avec eum' homme.

Cheule tiote poésie avot donné eune direction à m'vie.

Elle m'avot fait comprinte que l'indifférence dins eune société, conduirait directemint cheule société dins l'mur.

Ché bien biau d'acouter des discours, ché bien biau de dire quo qui faut faire, mais ché gramint miux quind on fait vramint quèque cosse pour quèqu'in.

Quind té tinds t'main pour ramasser l'Aute, pour pas qui quète incore pu bas, même quind y crot que ché pu possip', alors té déviens ti même un homme et té peux canger eune vie!

Lexique des mots compliqués :

- faire ginsse : faire la fête, boire plus que de raison
- bertonner : râler, disputer, être en colère contre quelqu'un
- tatouille : fessée, gifle
- voyette : petite rue
- groet : râteau, fourche, outil de jardinage
- archiner : goûter
- avoir querre : aimer, apprécier
- busiller : réfléchir, penser
- mouser : râler (pour les enfants capricieux notamment), faire la tête
- pécaille : une surprise
- gagner mirouille : gagner de l'argent
- brelle : mauvais, nul
- faire queuette : ne pas aller à l'école, faire l'école buissonnière
- indine : turbulent, insupportable
- biclou : vélo
- fate : fainéant
- querre (être) : tomber - « y est queut » : il est tombé
- jonne : jeune, enfant ou adolescent